

# CARMINA JOSEPHI TOZZI

---

Giuseppe Tozzi



Digitized by Google

JOSEPHI TOZZI

---

32  
1

CARMINA.

---



NEAPOLI

EX TYPOGRAPHIA AD SIGNUM ANCHORÆ

Largo S. Marcellino n.º 2.

---

MDCCCLXVI. 7.



# CAJETANO CANONICO BARBATI

SACRO EJUS NOMINI RECURRENTE DIE.

---

Dum saevos inter jactatur vita tumultus ,  
Atque animus valido curarum fluctuat aestu ,  
Tu mihi solus ades, rebus solamen amaris ,  
Atque adimis, BARBATE, metum, recreasque jacentem  
Spe dulci, dictisque seris bona gaudia mente.  
Scilicet alta petens animo , totaque volutans  
Mente Deum , parvi mortalia pendis , et ore  
Aspicias intrepido vitae casusque , vicesque ;  
Quaeque tibi virtus est coelitus addita , nostris  
Inspiras animis , et corda labantia firmas.  
Seditio , terras regnet bacchata per omnes ,  
Et quodcumque nocet , sibi fas, sibi censeat aequum.  
Te duce, nil paveam, quidquid furor, arma minentur,  
Nil mihi sit durum, nil non optabile tecum ;  
Uno te vivo , nunquam periisse videbor !  
Dulce decus, BARBATE, meum, et cura unica, salve.  
Si nomen laudesque tuas aequare canendo ,  
Haud mihi sorte datum , tamen omina sume libenter,  
Quae tibi laeta damus. Non auri pondus inane ,  
Non tituli decora alta tibi , populique faventis  
Auram opto , teneris quae tu generosus ab annis  
Despexisti ; bona sed longe meliora precamur.

Excelsi , *Deus ille* , Patris , Gnatique voluptas ,  
 Amborum *communis amor* , quo munera fonte ,  
 In terras plenis manant coelestia rivis ,  
 Adveniens bonus ipse , sua te numinis aura  
 Afflet , et admotis urat praecordia flammis ,  
 Ardeat unde tibi , dulcique liquescat amore  
 Pectus , semper ames , unoque in amore quiescas.  
 Te quoque largus opum cumulet septemplique dono ,  
 Quo coelestem agites mortali in corpore vitam ,  
 Vis te nulla premat , non te petat invida dente  
 Lingua , nec ulla tuos obducant nubila soles.  
*Ips*e , tuum comitetur iter , *Deus* , astraque visas  
 Serus , ubi extentos virtute impleveris annos ,  
 Victor et *injustis* spoliaris tartara *praedis*.  
 O tandem insano flagrantis igne *puellae* (1) ,  
 (Quas velut errantes certas ad ovilia rursus  
 Ducere , pastor , oves) , mentis caligine pulsa ,  
 Admoveantque tuis faciles hortatibus aures ,  
 Et vitae , incipiant studia illaudata , peractae  
 Horrere , et flammis longe melioribus uri !  
 Auguror eveniat ; coelo Thienci<sup>us</sup> heros ,  
 (Cujus , et effigiem , pietate insignis , et actis  
 Ipse refers , nomenque geris) sacra festa per aras  
 Annua dum colimus , meritosque novamus honores ,  
 Annuat o , felixque mihi , haud injusta roganti ,  
 Adsit , et assidua , supplex , prece Numen adoret ,  
 Ne pia vota cadant , neu sint haec omina vana ,  
 Candidiorque tibi redeat lux annua coelo .

(1) Hoc omen *Barbato* longe acceptissimum , qui in revocandis ad  
 meliorem frugem istiusmodi *puellis* totus est , nec ullis aut sumptibus ,  
 aut laboribus parcat . *Opera Dei revelare honorificum est.* JOB.

*Pia in Deum rota.*

Peccavi, quid faciam?

JOB.

Quid veniam pacemque negas, Rex magne, roganti?  
Obduras nostris pectora quid lacrymis?  
Peccavi, caelique (1) pudet convexa tueri,  
Meque tuum natum (2), teque vocare patrem.  
At quoties dixi: haud poenas e sonte reposcam,  
Quem pudeat sceleris, poeniteatque sui?  
Hei mihi, quem supplex, precibus nisi flecteris, orem?  
Vulnera quis medica nostra levabit ope?  
Parce, Pater, natique pius miserere gementis,  
Parce, tui non est pectoris iste rigor.  
Non oculi absistent lacrymis, non ora querelis,  
Ipse tua vinci ni pietate sinas.

---

Heu mihi quia peccavi nimis! quid faciam  
miser? ubi fugiam, nisi ad te Deus meus?

JOB.

Hanc animam commissa premunt dum pondere iniquo,  
Quis, nisi tu, misero dulce levamen erit?  
Perdere me potui, sine te, reus ecce fatetur,  
Emersisse malis, te sine, non potero.  
Hi gemitus, haec et moesti suspiria cordis,  
Non invisae mei signa doloris erunt.  
Flecte oculos animumque, Pater, jam parce fatenti,  
Neu patiari tuae facta perire manus (3).

(1) Nolebat nec oculos ad coelum levare. — *Ec.*

(2) Non sum dignus vocari filius tuus. — *Ec.*

(3) Opera manuum tuarum ne despicias. — *Psal.* 137.

*Ad Deum amandum , etiam publicorum odio  
facinorum excitamur.*

Ad te cuncta vocant , Deus , immortalia mentem,  
Quaeque olim finem sunt habitura suum.  
Quia *malefacta* hominum , rerum dum taedia nostro  
Augent corde , tui semina amoris alunt.

*Naturae una vox: Deus est.*

Lux tenebraeque , Deus , mors vitaeque, vesper et ortus,  
Atque elementa , tuum cuncta loquuntur opus.

*Bona et mala esse Deum testantur.*

Cum bona divini monumenta putemus amoris ;  
Iustitiae testes , quis neget esse mala ?

*In maximis reip: miseriis satius esse mori ,  
quam vivere.*

Dum scelerum facies multae , et fas vertitur omne ,  
Publica dum vitiis res perit aegra suis ;  
Cernere qui potero populi mala tanta ? perire .  
Sit melius ; terra est jam mihi culta satis !

*Amicorum vitiis nonnullam esse veniam adhibendam.  
Monitum varie repetitum.*

## I.

Et bonus , atque malus quivis : tu cautus , eodem  
Utere , qua bonus est , quave malus , fugito.

II.

Omni parte bonus , nemo est ; utaris amico ,  
Ut sapiens , visus qua tibi parte bonus.

III.

Et virtus, vitiumque viro sociantur in omni ;  
Si velis hinc omnes temnere , solus eris.

IV.

Est vitiis sine , nemo : si defugis omnes ,  
Invenies hostem , te quoque , quem fugias.

*Ad amicum.*

Tot mala perpressus , tu , praemia ad alta vocaris :  
Solamen justis datque , adimitque Deus.  
Tot mala perpressus quoque sum , cur praemia desunt ?  
Peccavi : satis est non periisse reo.

*Ad eundem , cum miram laudis significationem ,  
contra spem , esset consecutus.*

Laudem ex hoste refers , caris despectus amicis.  
Hocce quid est ? sapiens Ludit in orbe Deus.

*De paupere pauperi subveniente.*

Auxilium poterant inopi qui ferre , negarunt :  
Occurrit miseris quis modo rebus ? inops !



D. O. M.

MICHAEL TOZZI HIC SITUS EST  
VIR COMIS ET BENEFICUS  
QUI PRAEDIVITIS FAMILIAE FORTUNAS  
ANNOS III ET XXX SIC ADMINISTRAVIT  
UT AUCTAS IN TRIPLUM RELIQUERIT  
NULLA FILIIS TRADITA HAEREDITATE  
PRAETER INTEGRITATIS LAUDEM SINGULARIS  
QUAM CARUS FUERIT CIVITATI  
MOERORE FUNERIS INDICATUM EST.  
VIX AN. LVII. M. VI.  
REPENTINO MORT. EST MDCCCLXV.

---

D. O. M.

FELIX TOZZI MICHAELIS FILIUS  
EGREGIA INDOLE NATUS ADOLESCENS  
TORMENTI BELLICI QUOD MALE CAUTUS ATTRECTAVIT  
GLOBULO ERUMPENTE PERCULSUS  
ILLICO CONCIDIT EXANIMATUS  
CASU MISERANDO

---

